

ծամեծ վնասս եւ մահունս. արդ՝ երբ եւ է, ասեն, եւ սա¹ զնոյն խռովութիւնս յարուցանելոց է ի վերայ ձեր: 5 Որոց լուեալ զայս ամենայն բանս քսութեան ի ստեպն բանսարկուաց՝ կասկածէին ի համբաւոյն, եւ հայելով յառն յաջողակութիւն եւ յիմաստն՝ տրտմէին առ սերն:

6 Տեսեալ այնուհետեւ Վահանայ զայնչափ յարուցմունս նախանձաւորացն ի վերայ նորա, թէ ոչ երբեք կասեալ լռեն ի չար նախանձալից խաւսիցն՝ չկարացեալ տանել հանապազաւրեայ բանսարկութեանն, երթեալ ի դուռն՝ տկարանայր ի հաւատն. եւ եկեալ ի Զայս, սակայն եւ այնպէս խնուլ զբերանս չարախաւսացն ոչ կարեր: 7 Չի որ ոք բան ուղիղ ի հրապարակի առաջի իշխանի չգիտեր խաւսել՝ զնա ատեայր. եւ որ ոք յորս կամ ի թիրախ նետ չգիտեր ձգել՝ զնա պարտաւորեր. «Նստի, ասէին, եւ ամենեցուն ունչս առնէ»: 8 Եւ որ ոք անմտութեամբ զգործս արթունի չմարթեր գործել՝ ի նա բերեր զպատճառն. «Նա, ասէին, յառաջէ յամենայն ի գործս, եւ չտայ ինչ ումեք գործել կամ աւգտել»: 9 Վասն զի եր նորա գործակից², որում անուն եր Վրիւ, անանուն ըստ ազգի եւ անփորձ իրի, որդի առն Ասորոյ, բայց շատ-խաւսութեամբ եւ ընդվայրաբանութեամբ առաւելեալ նմաներ ազգի Ասորոց. որոյ չմարթացեալ գործել զգործ արթունի՝ երթեալ լիներ ամբաստան զՎահանայ առաջի թագաւորին Պերոզի, ասելով, թէ «Ինձ ի գործ ոսկեհատին չետ ինչ մաւտ երթալ³. եւ իւր ժողովեալ զամենայն ոսկի աշխարհին՝ խորհի երթալ առ կայսր եւ կամ յաշխարհն Զոնաց, եւ տուեալ զոսկին՝ կամի ինդրել գունդ եւ ապստամբել»:

10 Եւ լուեալ զայս ամենայն բան ամբաստանութեան⁴ զինքենէ իմաստախորհին Վահանայ, առաւել փութանակի զբազմութիւն ոսկւոյն՝ հասաներ⁵ ի դուռն: 11 Եւ լուեալ թագաւորին Պերոզի զճեպով երթալն Վահանայ՝ զարմացեալ ասեր, թէ «Եկդ Վահանայ այդպէս երագ՝ շատ ընդդէմ է բանիցն Վրուայ, մանաւանդ թէ բերեալ եւս ինչ է»: 12 Եւ եղեալ յանդիման թագաւորին՝ տեղեկանայր ի նմանէ թագաւորն Պերոզ, թէ արդարեւ բերեալ ինչ է. եւ լուեալ ի Վահանայ⁶ զբանիանութիւն բազմութեան ոսկւոյն զոր բերեալ եր՝ եւ ուրախանայր յոյժ: 13 Ապա եւ յանդիման Վահանայ տայր ասել Վրուայ զբանսն, զոր ասեր զնմանէ յառաջագոյն: 14 Եւ լուեալ Վահանայ զամենայն ասացեալսն Վրուայ՝ ետ պատասխանի առաջի թագաւորին եւ ասէ. «Գիտեմ եւ ես զանիմաստութիւն անձին իմոյ, ըստ ցուցանելոյ զիս ձեզ Վրուայ.

1 ԲԳտ. ասեն, սա

2 ՁԱտ. եր նա գործակից. այսպէս ըստ ուղղագրութեան ԲԳտ.

3 ՁԱտ. չետ ինձ մօտ (Ձ. ի մօտ) երթալ. այսպէս ըստ ուղղագրութեան ԲԳտ.

4 ՏՏ. ապստամբութեան

5 ՏՏ. եւ հասաներ

6 ՏՏ. զՎահանայ